

# Carta chiucu nú uquie'e San Juan

---

## Uxe'la Juan saludo

<sup>1</sup>Li'á enu rnibiya' lube sa'ahua enu nzeli arquia'ahua Jesucristo, rquie'a carta quie' luhua li'ihua enu ucañila Diose, li'ihua enu nzeli arquí' Jesucristo enu rni nu neli neca. Li'á neli se'ca li'ihua nu laca tucutsia li'á se'ca li'ihua, le'ca seca ye bee bene enu nzeli arquí' Diose li'ihua. <sup>2</sup>Li'á se'ca li'ihua xne nchiñi Stichia' Diose arquia'ahua nu siempre nehuañine cuna lia'ahua. <sup>3</sup>Pa'ahua Diose cuna Lli'ñinu Jesucristo, ri'inu nu cha nze'ca lu cuenda'hua nu hua'a arquí'nu li'ihua cuna nu liqui'nu nú nzuxee arquí'hua, xne nzequieehua stichia'nu, nu li'inu secanu li'ihua. Diose rnibiya' nú zeca'ahua bee sa'ahua. <sup>4</sup>Chiqui' ñia utsu arquia chenu ungabiya nu nu' bee sa'lu enu neli nzequie Stichia' Diose, nu nehuañi beella tucu nu rnibiya' Pa'ahua Diose. <sup>5</sup>Tucu nú se'ca li'ihua, ye bee enu neca sa'ahua ziquia luhua nu rqui'ña nu zecahua bee sa'ahua. Nu lunú rnia luhua nee la necuqui necane, le'ca li'i mandamiento quie' neca nú ubene'la'hua hasta chenu uquixie nú ubene'hua Stichia' Diose. <sup>6</sup>Tunu

se'ca'ahua Diose rria'ahua tucu nu rnibiya'nu; nu lunú rnibiya' Diose nú ubene'ahua desde chenu uquixie nú ubene'ahuane necane nu rqui'ña nú zeca'ahua bee sa'ahua

## Equie cuenda' bee bene enu zequienu arquí' bee bene

<sup>7</sup>Rquie'a bee nucua' luhua xne diqui lu iliulabe enzee huaxi bee bene enu sequienu bee bene, nu la chili arquí'beeí nú ube'ta Jesucristo lu iliulabe xi neca tucu bene. Nu bee enu rri'i scua sequienu beeí bee bene, nu li'ibeeí neca beeí enu rri'i condra Jesucristo. <sup>8</sup>Ubi'yahua li'ihua para nu la nitihua lunú rialahua, equie nu rri'ihua lunú niarquí' Diose. <sup>9</sup>Tatse bene enu sucu' equielá tucu nu uzete' Jesucristo bee bene, li'illa la nehuañilla cuna Diose, pero enu nzequie stichia' Jesucristo tucu nu uzete'nu bee bene, li'illa nehuañilla cuna Diose nu cuna Lli'ñinu. <sup>10</sup>Tunu nu' enu rri'ña ni'hua para nu zete' nze'e li'ihua tucu nu nzeli arquí' nze'e nu la necane tucu nu uzete' Jesucristo bee bene, la du'hua nze'e li'ni ni'hua nu la ri'ihua caso lunú rni nze'e. <sup>11</sup>Xne bee bene enu rri'i caso stichia' bene cua' neca

conformella lunú sequienu bene  
cua' bee bene. Último bedichia' nú  
rni lu carta quie'.

<sup>12</sup>Huaxi beenú niarquía nia  
luhua, pero la niarquía nu  
quie'ene lu carta. Nzuquia nú  
nzela bi'ya li'ihua para nú li'i

e'cua nia luhua, nu scua junto ñia  
tsu arquía'ahua.

<sup>13</sup>Bee bene enu ucañi Diose,  
li'ihua bee sa'a enu nzeli  
arquía'ahua Jesucristo enu nucua'a  
ca'a, xe'la beella saludo luhua.  
Amén.